

Banjir jejas lapan keluarga

Semua mangsa terlibat dipindahkan ke pusat pemindahan sementara sejak kelmarin

HILIR PERAK - Lapan keluarga di Tanjong Keramat, di sini berdepan detik cemas apabila kediaman mereka dinaiki air setinggi 1.2 meter akibat hujan lebat petang kelmarin.

Kejadian dipercayai berpunca dari hujan lebat sejak jam 5 petang itu menyebabkan 31 mangsa terpaksa berpindah ke pusat pemindahan sementara pada jam 10.30 malam kelmarin.

Mangsa, Nurul Faziera Tajuddin,

23, berkata, ini merupakan kejadian terburuk pernah terjadi di Kampung Kelapa.

"Sebelum ini sudah enam kali banjir tapi tak seteruk semalam. Air naik hingga paras pinggang dan saya hanya sempat menyelamatkan pakaian dan dokumen penting saja," katanya ketika ditemui di sini.

Menurutnya, hujan lebat bermula sekitar jam 5 petang dan pada jam 7 petang air mula memasuki rumah

sehingga paras lutut.

"Saya ingat air akan berhenti masuk tapi makin naik tinggi dan sehingga jam 9 malam, ia sudah berada di paras pinggang sehingga saya terpaksa keluar rumah sebab anak masih kecil.

"Sekitar jam 10.30 malam bantuan mula datang dan kami semua kena pindah ke dewan pejabat Jawatankuasa Kemajuan dan Keselamatan Kampung (JKKK) Tanjong Keramat," katanya.

Katanya, selain hujan lebat, parit di hadapan rumahnya juga menjadi faktor utama berlakunya banjir apabila air sering melimpah keluar apabila penuh.

"Parit itu bukan saja ada gelung air yang kecil tapi juga penuh dengan sampah sehingga menyukarkan laluan air.

"Jadi saya harap tindakan segera mendalamkan parit tersebut dapat dilakukan," katanya.

Sementara itu, Pegawai



Ketua Kampung Kelapa, Tanjong Keramat, Abdul Hamid Md Sulam (kanan) menunjukkan rumah mangsa banjir sambil diperhatikan Mohd Fazly (kiri) yang sudah surut ke paras lutut tengah hari semalam.

Pertahanan Awam Daerah Hilir Perak, Mohd Fazly Mohamad Zawawi berkata, pihaknya menerima panggilan pada jam 11 malam dan terus bergegas ke lokasi kejadian untuk membantu mangsa dan memantau keadaan banjir.

"Buat masa ini hanya lapan rumah dimasuki air sedalam 1.2 meter melibatkan 31 mangsa dengan

pecahan 12 lelaki, 12 wanita dan tujuh kanak-kanak termasuk dua bayi.

"Meraka dipindahkan ke dewan pejabat JKKK Tanjong Keramat untuk sementara waktu dan akan dibenarkan pindah apabila air kembali surut dan selamat diduduki," katanya.

Menurutnya, kesemua mangsa akan dibenarkan pulang ke rumah sekiranya hujan mula reda.



Keadaan parit yang dipenuhi sampah menyebabkan air tidak dapat mengalir dengan lancar dan melimpah keluar.